

Awe nos ta conmemora cu 54 año pasa, lider di PPA, Juan Enrique Yrausquin a fayece

UN DI e lidernan cu vision cu Aruba a conoce, ta Juan Enrique Yrausquin. Awe ta net 54 año pasa cu el a fayece, cu den e tempo ey, hasta su morto a ser cuestiona.

El a fayece na Corsou, debi cu e tempo ey, PPA tabata forma parti di Gobierno Central di Antiyas. Su morto a shock hopi hende, y a haya un entierro digno di un lider stima y sigur un estadista.

El a nace di 3 di december 1904 y a casa na Aruba cu María Waizberg. Juancho, tabata conoci pa su bida familiar y política.

Un di su prome trabao na Aruba tabata na Hollandse Bank. For di su posicion na Hollandse Bank el a sa di escala posicion den empresa, pero aspirando otro metanan, el a retira y a comienza traha cu John G. Eman, kende a cuminsa e tempo ey cu su propio banco, cu a bira conoci como John G. Eman Bank, cu na 1936 –a keda funda, di cual Juan Enrique Yrausquin ta su co-fundador.

John G. Eman Bank a lanta cu cooperación di Maduro & Curiel's Bank N.V., cu despues a bira Aruba Bank N.V., unda Juan Enrique Director desempeña funcion di Director Financiero te 1951, ora cu el a dicidi pa funda su propio partido PPA. Y su logro politico ta bon conoci, p'esnan cu a conoce.

Te awor, Juan Enrique Yrausquin cu su partido PPA t'e unico partido cu a saca 15 asiento den un eleccion na Aruba.

Juancho a destaca como un gran luchador pa su logronan, den su mayoría pa desaroyo económico, no solamente pa Aruba, pero tambe pa Antiyas Hulandes.

Día 1 de abril 1956, Juancho Yrausquin a bira miembro di Consejo di Minister di Antiyas, cubriendo e encargo di Minister de Finanza y Fomento, posición cu el a ocupa te su morto na Corsou día 20 di juni 1962 pa 7:30 di anochi na Hospital Santa Elisabeth.

Como homenahe adiciona el a haya un un plaza dilanti Oficina di Post na Playa, unda tamabe tin su estatua. Despues a duna honor pa nombra e prome boulevard cu ta pasa dilanti di e hotelnan mas importante di Aruba.

Ta di spera cu esnan cu ainda ta dirigi partido PPA, sa di recorda e gran estadista aki, kende awe ta net 54 año pasa a bay laga nos.

